

2 TESALONAYKA

Pol Minj Kisen Tesalonayka Biynimb Kuyip Tikak

Minim Nind Niņep

Pol, minj kisen Tesalonayka biynimb kuyip tikak ak, Jiysis andkind wip akan ma wip anġiy, gos par ay mindrep ma geyak, tikiy anġrep gak.

Minim Ar Keykey Mindip Rek:

Minim nind anġak ak mindip, chapta 1:1-2.

Pol binuk gunap yip Tesalonayka biynimb kuyip miker kuņaynep apek, Gor nup ma kirgeyak, miñmiñ yimb giyak minim ak mindip, chapta 1:3-12.

Krays yerer gakniņ andkind winiņgamb anġiy, anġrep gak minim ak mindip, chapta 2:1-17.

Pol Tesalonayka biynimb kuyip chinup Gor nup anġniņyinyiņ mindenimimb anġak minim ak mindip, chapta 3:1-15.

Minim anġ jiwniņġ, anġak minim day won gunap mindip, chapta 3:16-18.

1 ¹Chin Pol, Salas, Timotiy nimbip Tesalonayka biynimb Biyomb chin Jiysis Krays apiymiņay ker mindpim gok, minj tiksipun.

²Chinup tep gip ak; kiy apiymiņay nimbip simb niņiy kond minder, ñin ar kuyipapiy ak mindiy, mindrep ginimimb.

Krays Apiy Biynimb Nimbip Timey gipay Gok Kuyip, Yiwur Niņiņgamb

³Pen mam ay sikop. Jiysis nup chiņġrep giyiņġ gem amġap ak chinup tep gip. Biynimb nup ker mindpay gok kuyip, wasemb ay direp yimb gipim ak; Gor nup tep anġyinyiņ nep mindpun. ⁴Gor ker mindem, biynimb gunap nimbip timey gey kosyam mindpim ak pen; gos kun ak ma niņiy, nup chiņġrep yimb gipim. Kun ak biynimb Gor ker miñmon keykey gok per apun, “Tesalonayka biynimb Gor nup gosimb niņbay gok, nup chiņġrep yimb gipay apun.” ⁵Mindrep gipim kun ak, biynimb nuk

mindpun angem nimbip miker ñiyiᅅ nep mindpay rek; Gor bi per minim tungasikrep gip ak, nimbip biynimb yand yimb anᅅiy diniᅅgamb. ⁶Pen nuk Biyomb mindip rek, miñ yipund giniᅅgamb ar ak nep giniᅅgamb ak mey; biynimb nimbip miker ñiyiᅅ mindpay gok kuyip, pen kunep miker ñiniᅅgamb. ⁷Pen chin biynimb nuk miker diyiᅅ nep mindpun gok, direp yimb giniᅅgamb. Ñin kun ak Biyomb chin Jiysis Krays, enjol kalrimey nuk gok poᅅind mon maᅅlaᅅ rek yinakniᅅ winiᅅgamb. ⁸Biynimb Nop nup kirgiy, Biyomb chin Jiysis nup minim tep ak kirgiy, timey ar ak gey amimb gok, yiwur yomb ñiniᅅgamb. ⁹Biynimb kun gok tip tep nuk mindeniᅅgamb siᅅak, amniᅅgiy rek ma ayiniᅅgamb; per gol okok mindiy, yiwur yomb diyiᅅ mindeniᅅgambay. ¹⁰Pen winiᅅgamb ñin kun ak tikiy, biynimb nuk gok, gos kiyk ak am nup kom kom gakniᅅ, miñmiñ yimb giyiᅅ, yimb nup dand aranyiᅅ pernep mindeniᅅgambay. Pen nimb minim nup ak anᅅonuk niᅅbik rek, chin yip kun giniᅅgambun.

¹¹Ar kun ak Gor nup per anᅅniᅅiy apun, “Nand Biyomb mindpan rek, Tesalonayka biynimb key niᅅay dinak gok kond mindenimin, biynimb tep nak gok mindiy, niripapiy gosimb niᅅyiᅅ, woᅅᅅ tep yerip yerip giniᅅgiy gok amrep ginimuᅅ apun.” ¹²Gor nup anᅅniᅅbun kun ak; kiy apiymiᅅay nimbip simb niᅅiy direp gipiyr rek, yimb kuyip apiymiᅅay ak sek, nimbip ak sek aranimuᅅ apun.

Bi Gor Low Timbrikep

2 ¹Mam ay sikop. Biyomb chin Jiysis Krays andkind apiy chinup yipruᅅᅅ dek, nuk yip mindoniᅅgambun minim ak niᅅyiᅅᅅ mindenimimb. ²⁻³Pen biynimb gunap ñin yomb nuk pisnep wiᅅ anᅅiy, nimbip yesek anᅅeniᅅgiy, gos yomb kun ak ma niᅅnimimb. Gor gos ñek aspun akaᅅ, Pol bi gok miᅅj bap tikiy minim kun ak rek anᅅey aspun anᅅeniᅅgiy; minim kuyip ak ma dinimimb. Chin miᅅj kun ak rek anᅅiy ma tikpun. Ñin yomb kun ak winiᅅ gakniᅅ, biynimb kuᅅaynep Gor nup kirgiy, monmon giniᅅgambay. Kun giyakniᅅ, bi timey Gor low timbrikep mon key yinjap amniᅅgamb ak niᅅniᅅgambay. ⁴Bi timey kun ak Gor sek, tap yerip tap yomb anᅅiy anᅅniᅅbay gok sek anᅅsikoy giy, yand nep biyomb anᅅiy; am Gor anᅅniᅅep korip ak am bisgiy, yand mey Gor anᅅniᅅgamb.

⁵Nimb yip mindiy, bi kun ak nind ap kun giniᅅgamb anᅅiy anᅅnik ak pen; sakiy gipim rek ayip. ⁶Nimb niᅅbim: tap bap kinᅅᅅ tikip ak mey; miñiy kun ginimuᅅ rek ma ayip. Gor nuk key anᅅayak ñin ak apek, kun giniᅅgamb.

⁷⁻⁸Pen miñiy ñin biy, bi low timbrikep apek giniᅅgambay ar ak gispay ak pen, kisen nep gispay. Bi kinᅅᅅ timey kun gok rek tikip ak mindakniᅅ, bi low timbrikep ak, biynimb gok tapin kind nuk okok dand amnimuᅅ rek ma ayip. Pen Gor bi kinᅅᅅ tikip kun ak nup dand key okok

amek, bi low timbrikep ak, Gor aŋgip ar ak pisnep kirgiy, ar ak key gek amniŋgamb. Timey yimb giniŋgambay ñin kun ak, biynimb yikop gok Gor giniŋgamb angak rek nep gisap aŋgiy, niŋniŋgiy rek ma ayniŋgamb. Pen chinup per gos tep ñek niŋbun rek, ñek niŋniŋgambun. Bi low timbrikep kun ak winiŋgamb ak pen; Jiysis mokyaŋ giy apiy minim aŋgek, pisnep apyowniŋgamb.

⁹Pen Seytan bi timey kun ak nup ambaŋ ayek, biynimb gok kuyip yesek aŋgiyn aŋgiy, tap mageprek yesek gok giniŋgamb. Gakniŋ, biynimb wal yimb aŋgyakniŋ aŋgniŋgamb, “Yand mey biyomb aŋgniŋgamb.” ¹⁰Aŋgek, biynimb pisnep kumniŋgambay gok, niŋind aŋgip aŋgiy niŋniŋgambay. Pen minim nup ak kirgiy, Gor minim ak tep aŋgiy dembiyap: Gor kuyip dipkop. ¹¹Yenen, minim niŋind yimb ak kirgiy, minim yesek niŋun aŋgiy giniŋgambay kun ak; Gor gek ar kun ak tapin gey amniŋgamb. ¹²Kun ak mey, biynimb minim niŋind yimb nup ak kirgiy, minim yesek kun ak niŋey tep giniŋgamb gok, maŋgiysek yiwur yomb yimb ak diniŋgambay.

¹³Pen chin per nimbip Biyomb chin ak wasemb ayip rek niŋiy, Gor nup tep aŋgjun. Nimbip simb niŋiy diniŋ, Kawnan nuk ak yokek, ap nimbip gos ñek mey, nup gosimb niŋiy, biynimb suŋ-tep nuk yimb mindpim. Kun ak, nup aŋgniŋiy, tep aŋgjun.

¹⁴Pen Gor nuk key nimbip niŋay, Ñiyand ak yip perper mindrep giyaŋ aŋgiy gek, minim tep ak nimbip aŋgonuk niŋbik. ¹⁵Kun ak mey mam ay sikop. Gor gek, Ñinuk yip mindrep giniŋgambun kun ak, minim aŋgñon niŋbik ak sek, minj tikiy aŋgon niŋbik ak sek niŋiy, mindrep ginimimb.

¹⁶Bapiy yomb apiymiŋay chinup gos niŋiy kond mindrep gipiyr ak, chinup per kond mindeniŋgayr aŋgiy, gos sek mindpun. ¹⁷Kun ak Tesalonayka biynimb, Gor apiymiŋay nimbip kond minder, woŋg kuyipapiy ak ma kirgiy, minim tep aŋgyiŋg, woŋg tep giyiŋg nep mindenimimb.

Pol Chinup Lotiw Ginimimb Angak

3 ¹Mam ay sikop. Minim bap aspun ak, chinup Gor nup aŋgniŋiyiŋg mindenimimb. Nimbip Jiysis minim aŋgñon niŋiy dem, biynimb kuŋaynep nimbip niŋiy kunep dey, Jiysis minim tep ak aŋgey kind kind amnak rek, miñiy akniy aŋgon kunep ginimuŋ. ²Pen bap nup aŋgniŋem, bi timey mindrep ma gipay gok, chinup tap bap giniŋgiy rek ma aynimuŋ. Yenen: biynimb maŋgiysek Gor nup gosimb ma niŋbay.

³Pen Biyomb chin ak nuk bi biynimb kond mindep ak mey, nimbip kond mindakniŋ, Seytan nimbip timey ginimuŋ rek ma ayniŋgamb.

⁴Pen chinup gos ñek niŋiy apun ar ak nep giyiŋg mindenimimb. ⁵Nup aŋgniŋiy apun, “Kuyip gos tep ñenimin, nand biynimb wasemb apan rek niŋiy, Ñinak yiwur yomb dak ak pen; minim nip ma kirgak rek niŋiy, kiyk kunep giniŋgiy apun.”

Wong Giy Nep Tap Ñiñnimimb

⁶Mam ay sikop. Biyomb chin Jiysis Krays aḡñnimimb aḡak rek nimbip aspun. Mam gunap wong ma giy yikop nep giranḡiy, apun rek ma geniḡiy, kiy yip minim minim ma aḡnimimb. ⁷Nimb key niḡbim: chin nimb yip mindiy giyiḡipun ar ak geniḡambim, tep giniḡamb. Chin yikop ma mindiyḡipun. ⁸Biynimb gunap tap keñmaḡiy kuyip yikop ma ñiñjun aḡiy, pumbnamb kisyimken tiḡiy yiwur giy nep tap ñimbyiḡipun. ⁹Gor wong gipun rek, nimbip aḡniḡiy tap monmon diy ñimbinup ak pen; nimbip miñ tep ar ak yomon niḡyaḡ aḡiy, key tiḡiy yiwur giy tap ñimbyiḡipun. ¹⁰Pen nimb yip mindiy aḡnuk, “Biynimb wong ma giniḡiy gok tap ma ñiḡniḡiy aḡnuk” ak niḡbim.

¹¹Minim bap niḡbun ak; biynimb nimb gunap wong ma giy, yikop nep mindiy, biynimb aḡjiwpay. ¹²Biyomb chin Jiysis Krays mindip rek, biynimb kun gok kuyip minim kilis giy aspun ak, wong key giy, tap ñimbyiḡ kapkap mindrep giniḡiy.

¹³Pen mam ay sikop. Gor nup yenen wong gispun aḡiy yiruk ma niḡiy, mindrep giyiḡ gem amnimuḡ.

¹⁴Minim minj tikiy aspun biy, biynimb gunap ma niḡeniḡiy, kuyip minim minim ma aḡnimimb; yikop mindem kuyip nambiḡ ginimuḡ.

¹⁵Pen kuyip miluk ma niḡnimimb; mam chin aḡiy aḡñirep ginimimb.

Pol, Nimb Mindpim Aḡak

¹⁶Biyomb biynimb kond mindek mindrep gipay ak, nimbip kond mindonimuḡ, mindrep giyiḡ nep mindenimimb.

¹⁷Yand Pol. Minj day biy yand key tikiy, “Nimb mindpim?” aspiyn. Minj yand tikpiyn ak, per kun biy rek nep tikpiyn ak mey, niḡniḡambim.

¹⁸Pen Biyomb chin Jiysis Krays chinup simb niḡimb ak, nimbip kond mindonimuḡ.